

Mas’uliyat – jurnalistning jamoat oldidagi majburiyati, axborot tarqatish jarayonida so‘z va harakatlarining oqibatini anglash darajasi bilan belgilanadi. Bu tamoyil jurnalistdan faktlarni aniqlik bilan tekshirish, yolg‘on, manipulyativ yoki zararli ma’lumot tarqatmaslik, huquqiy va axloqiy me’yorlarga rioya qilishni talab etadi. Ayniqsa pandemiya, tabiiy ofat yoki favqulodda vaziyatlarda ishonchli axborot berish jamoat xavfsizligi uchun hal qiluvchi ahamiyatga ega. Mas’uliyat tamoyili jurnalistning ishonchi va professional obro‘cini saqlab qolishda muhim omil hisoblanadi. Xitoylik jurnalist Chjan Uhan shahrida pandemiya boshlanishi haqidagi xabar va vizual materiallarni ommaga taqdim etganidan so‘ng hibsga olinib, “tartibsizliklarni qo‘zg‘atish” ayblovi bilan 4 yilga qamalgan. U 2024-yilda ozod etilgan bo‘lsa-da, 2025-yil avgust oyida yana qamoq jazosiga hukm qilindi. “Chegara bilmas muxbirlar” tashkiloti bu holatni inson huquqlari haqidagi tanqidiy materiallar bilan bog‘liq tarzda tahlil qilgan<sup>1</sup>. Ushbu holat pandemiya sharoitida jamiyatni xabardor qilish zarurati bilan davlat cheklovlari orasidagi axloqiy va huquqiy ziddiyatni namoyon etadi.

---

<sup>1</sup> Kun.uz. COVID-19 pandemiyasi boshlanishini yoritgan xitoylik jurnalist 4 yilga qamaldi. // Kun.uz. 2025. 21.09. <https://kun.uz/news/2025/09/21/covid-19-pandemiyasi-boshlanishini-yoritgan-xitoylik-jurnalist-4-yilga-qamaldi>.